

*Primeiro curso*

## Contidos

1. O feito relixioso. Primeiras concepcións relixiosas: animismo, zoomorfismo, antropomorfismo.
2. O politeísmo. A relixión do antigo Exipto. Mitoloxía grecorromana.
3. Principais relixións de Asia: hinduísmo, budismo.
4. Monoteísmo: a Biblia como fonte das tres grandes relixións monoteístas.
5. O xudaísmo. Historia e relixión do pobo de Israel.
6. O cristianismo. Nacemento e expansión.
7. O islam. Nacemento e expansión.
8. As relacións do cristianismo, xudaísmo e o islam na Península Ibérica.

## Criterios de avaliación

1. Identifica-la pervivencia das antigas relixións politeístas na nosa cultura.
2. Identifica-los momentos fundacionais das tres grandes relixións monoteístas arredor da experiencia dos fundadores que lles deron orixe.
3. Establece-las relacións entre o xudaísmo, o cristianismo e o islam ó longo da historia.
4. Valora-la influencia das tres relixións monoteístas na configuración da nosa propia historia e cultura.

*Segundo curso*

## Contidos

1. Humanismo, reforma e contrarreforma.
2. Cristianismo, Ilustración e liberalismo.
3. Ciencia e relixión na Europa do século XIX.
4. Totalitarismo e relixión no século XX. A catástrofe moral dos totalitarismos.
5. Islam contemporáneo: tradicionalismo, reformismo e integristismo.
6. Xudaísmo: o establecemento do Estado de Israel. Tradición e modernidade.

## Criterios de avaliación

1. Analiza-la evolución da historia do xudaísmo, do cristianismo e do islam desde o século XVI ata os nosos días.
2. Identifica-los conflitos entre o cristianismo e a modernidade durante os séculos XVII, XVIII e XIX.
3. Analizar e valora-la evolución do cristianismo en España.
4. Analiza-lo papel das diferenzas relixiosas e culturais estudadas no mantemento da paz ou no estalido de conflitos.

## MINISTERIO DE SANIDADE E CONSUMO

**13285** *REAL DECRETO 744/2003, do 20 de xuño, polo que se modifica o Real decreto 414/1996, do 1 de marzo, polo que se regulan os produtos sanitarios, en materia de clasificación de implantes mamarios.* («BOE» 158, do 3-7-2003.)

O Real decreto 414/1996, do 1 de marzo, polo que se regulan os produtos sanitarios, establece no seu

anexo IX as regras de clasificación de tales produtos. Este real decreto incorporou ó ordenamento xurídico nacional a Directiva 93/42/CEE do Consello, do 14 de xuño do 1993, relativa ós produtos sanitarios, a última modificación da cal se efectuou mediante a Directiva 2001/104/CE do Parlamento Europeo e do Consello, do 7 de decembro de 2001.

O citado Real decreto 414/1996 sufriu varias modificacións recollidas no Real decreto 2727/1998, do 18 de decembro, polo que se modifica o Real decreto 414/1996, do 1 de marzo, polo que se regulan os produtos sanitarios; no Real decreto 1662/2000, do 29 de setembro, sobre produtos sanitarios para diagnóstico, «in vitro», e no Real decreto 710/2002, do 19 de xullo, polo que se modifica o Real decreto 414/1996, do 1 de marzo, polo que se regulan os produtos sanitarios, no referente ós que incorporen derivados estables do sangue ou plasma humanos.

A Directiva 2003/12/CE da Comisión, do 3 de febreiro de 2003, sobre a nova clasificación dos implantes mamarios, no marco da Directiva 93/42/CEE, reclasifica os implantes mamarios de maneira que, malia as regras establecidas no anexo IX da citada Directiva 93/42/CEE, os devanditos implantes pasan de ser produtos sanitarios «clase IIb» a ser produtos sanitarios «clase III», categoría reservada ós produtos máis críticos.

Para incorporar ó ordenamento xurídico interno a citada Directiva 2003/12/CE, é preciso modifica-lo Real decreto 414/1996, do 1 de marzo, o que se efectúa mediante esta disposición.

Así mesmo, considerouse conveniente incluír entre as facultades de desenvolvemento atribuídas ó Ministerio de Sanidade e Consumo a de adopta-las disposicións que, en relación coa clasificación ou reclasificación dos produtos sanitarios ou a modificación ou adaptación, se é o caso, das regras de clasificación destes produtos, se adopten no nivel comunitario ou resulten aconsellables por razóns técnicas ou científicas.

Este real decreto dítase ó abeiro do disposto no artigo 149.1.16.<sup>a</sup> da Constitución, e de acordo co establecido nos artigos 40.5, 95 e 110 da Lei 14/1986, do 25 de abril, xeral de sanidade, e nos artigos 1.3, 2.1 e disposición derradeira única da Lei 25/1990, do 20 de decembro, do medicamento.

Na elaboración desta disposición foron oídos os sectores afectados e as comunidades autónomas, e emitiu informe o Consello de Consumidores e Usuarios.

Na súa virtude, por proposta da ministra de Sanidade e Consumo, de acordo co Consello de Estado e logo de deliberación do Consello de Ministros na súa reunión do día 20 de xuño de 2003,

## DISPÓN O:

**Artigo único.** *Modificación do Real decreto 414/1996, do 1 de marzo, polo que se regulan os produtos sanitarios.*

Introdúcense as seguintes modificacións no Real decreto 414/1996, do 1 de marzo, polo que se regulan os produtos sanitarios:

Un. Engádese unha disposición adicional décimo primeira, coa seguinte redacción:

«Disposición adicional décimo primeira. *Reclasificación de implantes mamarios.*

Malia as regras establecidas no anexo IX deste real decreto, os implantes mamarios reclasifícanse como produtos sanitarios incluídos na clase III.»

Dous. Engádesse unha disposición transitoria sexta, coa seguinte redacción:

«Disposición transitoria sexta. *Vixencia da lexislación anterior sobre clasificación e comercialización de implantes mamarios.*

1. Os implantes mamarios comercializados antes do 1 de setembro de 2003 e que fosen avaliados consonte o disposto na alínea a) do punto 1.2.<sup>a</sup> do artigo 8, ou consonte o disposto na alínea b).3.<sup>o</sup> do punto 1.2.<sup>a</sup> do artigo 8 deste real decreto, estarán suxeitos a un novo procedemento de avaliación da conformidade como produtos sanitarios de clase III antes do 1 de marzo de 2004.

2. Malia o disposto no artigo 23.4 deste real decreto, non se prorrogarán as decisións sobre implantes mamarios adoptadas polo organismo notificado antes do 1 de setembro de 2003 consonte a alínea a) do punto 1.2.<sup>a</sup> do artigo 8.»

Tres. Modifícase a redacción da disposición derradeira única, que queda redactada da seguinte maneira:

«Disposición derradeira única. *Facultade de desenvolvemento.*

Facúltase o ministro de Sanidade e Consumo para dicitar cantas disposicións sexan necesarias para a aplicación e desenvolvemento deste real decreto, así como para actualiza-las relacións de produtos establecidas no punto 4 do artigo 25 e na disposición adicional quinta, e para adopta-las disposicións que, en relación coa clasificación ou reclasificación dos produtos sanitarios ou coa modificación ou adaptación, se é o caso, das regras de clasificación destes produtos, se adopten no nivel comunitario ou resulten aconsellables por razóns técnicas ou científicas.»

**Disposición derradeira primeira. *Título competencial.***

Este real decreto dítase ó abeiro do disposto no artigo 149.1.16.<sup>a</sup> da Constitución, e de acordo co establecido nos artigos 40.5, 95 e 110 da Lei 14/1986, do 25 de abril, xeral de sanidade, e nos artigos 1.3, 2.1 e disposición derradeira única da Lei 25/1990, do 20 de decembro, do medicamento.

**Disposición derradeira segunda. *Entrada en vigor.***

Este real decreto entrará en vigor o día 1 de setembro de 2003.

Dado en Madrid, o 20 de xuño de 2003.

JUAN CARLOS R.

A ministra de Sanidade e Consumo,  
ANA MARÍA PASTOR JULIÁN

## MINISTERIO DE EDUCACIÓN, CULTURA E DEPORTE

**13383** REAL DECRETO 743/2003, do 20 de xuño, polo que se regula a proba de acceso á universidade dos maiores do 25 anos. («BOE» 159, do 4-7-2003.)

A Lei orgánica 6/2001, do 21 de decembro, de universidades, no punto 1 da súa disposición adicional vixé-

sima quinta, establece que o Goberno, logo de informe do Consello de Coordinación Universitaria, regulará as condicións básicas para o acceso á universidade dos maiores do 25 anos que non estean en posesión do título de bacharelato ou equivalente.

En desenvolvemento desta disposición, este real decreto pretende fixar uns criterios básicos cos que poder valorar, por un lado, o grao de madurez e idoneidade dos candidatos a que se refire o parágrafo anterior para seguir con éxito estudos universitarios, así como a súa capacidade de razoamento e de expresión escrita e, por outro lado, as súas habilidades, capacidades e aptitudes para seguiren e superaren os estudos relacionados coa opción elixida.

Así mesmo, este real decreto deixa sen efecto a normativa ata agora vixente, que perdera parte da súa vixencia trala aprobación das leis orgánicas 11/1983, do 25 de agosto, de reforma universitaria, e 1/1990, do 3 de outubro, de ordenación xeral do sistema educativo, e máis aínda desde a recente aprobación da Lei orgánica 6/2001, do 21 de decembro, de universidades.

Este real decreto foi consultado coas comunidades autónomas e sobre el emitiron informe o entón Consello de Universidades, en uso da autorización contida na disposición transitoria primeira da Lei orgánica 6/2001, do 21 de decembro, e o Consello Escolar do Estado.

Na súa virtude, por proposta da ministra de Educación, Cultura e Deporte, coa aprobación do ministro de Administracións Públicas, de acordo co Consello de Estado e logo de deliberación do Consello de Ministros na súa reunión do día 20 de xuño de 2003,

### DISPONGO:

**Artigo 1. *Obxecto e ámbito de aplicación.***

1. Este real decreto ten por obxecto regula-las condicións básicas para o acceso á universidade dos maiores do 25 anos que non reúnan os requisitos previstos no punto 2 do artigo 42 da Lei orgánica 6/2001, do 21 de decembro, de universidades.

2. Os maiores do 25 anos de idade que non estean en posesión do título de bacharelato ou equivalente poderán ingresar directamente na universidade, mediante a superación da proba de acceso que se regula neste real decreto. Só poderán concorrer á citada proba de acceso os que cumpran, ou cumprisen, os 25 anos de idade antes do día 1 de outubro do ano natural en que aquela se celebre.

**Artigo 2. *Estructura xeral da proba de acceso.***

1. A proba de acceso á universidade a que se refire o artigo 1 estrutúrase nunha proba común e nunha proba específica.

2. A proba común terá como obxectivo apreciar a madurez e idoneidade dos candidatos para seguir con éxito estudos universitarios, así como a súa capacidade de razoamento e de expresión escrita. Comprenderá tres exercicios referidos ós seguintes ámbitos:

- Comentario de texto ou desenvolvemento dun tema xeral de actualidade.
- Lingua castelá.
- Lingua estranxeira, a elixir entre inglés, francés, alemán, italiano e portugués.

No caso de que a proba se celebre en universidades dependentes de comunidades autónomas con outra lingua cooficial, a comunidade autónoma competente poderá establecer a obrigatoriedade dun cuarto exercicio referido á lingua cooficial.